

## Bia plascher e novas experientschas

Il «camp per affons e tgauns» ha giu liug per la tiarza ga a Segnas

DA SUSI ROTHMUND / ANR

Dapi treis onns semida Segnas duront ina jamna da stad mintgamai en in vitget cun in tschuat affons, giuvante-tgna e tgauns. El center dil camp per affons e tgauns da «Jugend und Hund» schai oravontut il plascher mo ils menaders dattan era vinavon lur vasta savida per luvrar culs tgauns che valan sco ils accumpignaders ils pli fideivels dils carstgauns. «Jeu hai adina gudiu fetg da prender part a quels camps,» ha *Maya Altorfer* declarau. Las empremas ga ch'ella ei stada el camp per affons e tgauns accumpignava ella sia mumma *Sandra*, ina menadra ed organisatura dil camp. Suentar eis ella stada leu sco participonta e dapi enzacons onns ei la giuvna da 28 onns activa sco menadra. Il sulegl braslentava ferton che nus havein discurriu silla senda da viandar denter Bugnei e Segnas. Leu spitgava ella da tutta calira tier in dils posts dil percours da «Canin Cross» ch'ils participonts dil camp han absolviu quei di. Tgi pli spert e tgi pli plaun. Ils affons han stuiu s'adattar al tempo da lur tgauns ed il cuntrari era. Maya ha fatg il brevet I da «Jugend und Hund» e sa perquei s'engaschar sco menadra. Sco ella ha raquintau han tut ils menaders pliras scolaziuns e san dar vinavon massa savida – naven da percours d'obstachels tochen tier tgauns d'accumpignament.

### Il tgaun sto esser in onn vegls

Aschia san ils affons far novas experien-tschas, empernder da luvrar cul tgaun, luvrar en gruppa e scuvierer bia niev e forsa perfin anflar in niev hobi. Ils 38 participonts dil camp ein denter 9 e 18 onns vegls. Els san prender part cugl agen tgaun, cun in da parents ni enconuschents. Affons che vulan prender part e han buc in tgaun astgan era s'annunziar e forsa gartegia ei schizun d'empristar in dad in ni l'auter dil team da menaders che vegnan el camp cun in, dus tgauns. Suletta premissa ei ch'il tgaun hagi in onn. Cuors specials per possessurs da tgauns ston ils affons buca haver frequentau. Entgins han denton gia dabia experientscha e per saver luvrar meglier vegnan ei perquei parti en treis gruppas. Sco Maya ha declarau, svariescha la finamira dil camp dad affon tier affons. El focus stattan denton oravontut il plascher ed il ligiom tier igl animal: «Affons e tgauns duein haver plascher.» Secapescha seigien menadras e menaders adina era attents ch'ils animals vegnien buc surstrapazai dallas situaziuns. In ni l'auter drovi magari ina pausa dapli e da temperaturas da stad sco uonn seigi ei dad ir ina ni l'autra ga dapli tier il dutg per ch'ils tgauns possien sefrestgentar. Il program duront il camp ei zun varionts e tonscha dil percours tochen alla viseta dil polizist cun siu tgaun entochen alla excursiun en muntogna.

### Liug ideal

Culla casa da gruppas Alpina a Segnas han ils organisatur dil camp per affons e tgauns anflau in liug ideal. Tenor Maya eis ei numnadamein buc aschi sempel d'anflar ina casa nua che tons affons e tgauns seigien beinvegni e hagian avunda spazi. A Segnas san ei occupar igl entir tschaler da schurmetg dalla casa e leu ellas boxas dorman ils tgauns stupent e ruasseivel. Aschia ha «Jugend und Hund» era previu d'organisar ils proxims dus camps da stad a Segnas. Il 2019 ha quel liug dils 21 – 27 da fenadur. Las informaziuns necessarias ve-gnan

actualisadas incuntin sin la pagina d'internet [www.jugend-hund.ch](http://www.jugend-hund.ch). Leu dat ei era in blog davart las aventuras el camp da stad 2018 e perfin in filmin da treis participontas che muossa fetg bein tgei bialas vacanzas ch'ils affons, giuvenils, menaders e tgauns han passentau la fin fenadur a Segnas.